



MOVIMENTO PER L'INDIPENDENZA DELLA SICILIA

fondato nel 1943

Storia dû Vèspiru (parti secunna)

**«Libbiri muremu sutta a chisti santi mura, ma
mai cchiui comu li schiavi piecati a li Franzisi !»**

Carlu I d'Angiò

Carlu, quannu seppi ca 'n Palermu e nti quasi tutta la Sicilia cci avìa statu ddu gran ribbillamentu, di unn'era, ivu di corsa a Nàpuli pri sèntiri, no la cunferma di zoccu avìa avvinutu, ma li dittagghi dâ straggi dî soi. Jennu avanti e arredi pâ càmmira dâ reggia, cci giurau di fari trimenda minnitta cò ferru e cò focu e di fàrini di la Sicilia nu scogghiu nudu e disèrticu. E accuminciau la pirsicuzioni dî mircanti siciliani ca s'attruvàvanu a Nàpuli e ca s'èppiru ammucciari e fuirisinni pri tinìrisi arassu di l'occhi e di li manu d'iddu.

Mentri ca Carlu preparava na spidizioni pâ Sicilia, mintennu nzemi forzi di terra e di mari p'abbiaricilli ncoddu a la mèsira Sicilia, cci purtaru la nutizzia ca macari Missina s'avìa aribbillatu e ca nti l'Ìsula nun s'attruvava cchiui nu franzisi, mancu a circàrilu cû lantirninu. Allora, a Carlu, ci pàrsiru picca li forzi c'avìa a dispusizioni e cci n'addumannau, e l'appi, ô Re dâ Franza, ô Papa, a li cità guelfi di la Toscana e di la Lummardìa, a Genuva e Vinezzia: a Catuna s'aricugghiu n'asèrcitu furmatu di 15 mila cavaddi, 60 mila fanti, 150 navi di guerra e n'àutri 200 navi di trasportu. Tanti genti e tanti armi nti ddi tèmpura non si nn'avianu aricugghiuti mai, mancu pri na Crucziata!

Tutti ssi preparativi jeru avanti pri tuttu lu misi d'Aprili e nti ssu tempu di Missina si putianu sèntiri li sona dî trummi e si putianu vidiri li lampi ca facianu li spati e li curazzi ô sulì.

Macari ntâ Sicilia si travagghiava pri urganizzàrisi a la difinziva; a Missina si tinni allora lu parramentu di la "Lega dî Cumuni Siciliani" ca urdinau: fussi mannatu a Missina acqua di viviri e manciari c'abbastassi pri dui anni e fùssiru raffurzati l'arceri e li balistreri; si mannàssiru òmini e navi cu ottu capitani a vardia di Catania, d'Austa, di Sarausa, di Milazzu, di Patti e di Cifalù; si facissi, nzumma, tuttu p'arisistiri a ddu sforzu di menza cristianitati ca Re Carlu avìa cuncinratu contru a la Sicilia. Lu primu attaccu dû nimicu era d'aspittarisillu a Missina e li missinisi si preparàvanu a la difinziva pri mari e pri terra: la campagna arredi a la cità vinni apparaggiata e schianata, foru schiantati li vigni, sdirubbati li casi di campagna e li ligna e lu matiriali di chisti fu mpijatu p'abbissari e rènniri cchiù forti li mura dâ cità; vinniru fabbricati màchini, si prepararu armi. A mari, la trasuta dû portu vinni chiuruta cu travi galliggianti e catini; foru tinuti pronti li navi di guerra e fu preparatu lu focu grecu, prontu pri èssiri ittatu contra a li navi nimichi.

A lu 2 di giugnu quaranti navi angiuini foru mannati pri Missina e chista ci nni mannau trenta a lu ncontru; chiddi, supprinnuti ca la mèsira Sicilia ammustrava li denti, si nni turnaru arredi pri Scilla. Vidennu Carlu ca l'ossu di Missina era duru di manciari e chista dû mari non si putìa pigghiari cu facilitati, ci vinni la pinzata dassartari Milazzu e di terra iri pri Missina.

A lu 24 di giugnu, cu sissanta navi, chiossai di milli fanti e cincuentu cavalieri e cavaddi sbarcaru a Milazzu. Cui potti cùrriri curriù p'appunìrisi; ma chiddu non fu nu cummattimentu, fu nu macellu dî nostri; e ni mòrsiru chiossai di milli, sparti di chiddi ca foru fatti priggiuneri.

Balduvinu Mussone, capitanu dû pòpulu di Missina, c'avìa cunnuciutu malamenti la risistenza di Milazzu, vinni dipunutu e ô so' postu fu misu Alaimu di Lentini, ca era unu di cchiù putenti baruni di Sicilia, uramai vecchju d'etati, ma spertu assai d'armi e di guerra.

Missina assediata

Doppu la vittoria avuta a Milazzu, Carlu mpijau n'àutru misi a fari preparativi pri la guerra; avìa giuratu ca tutti li siciliani avianu a èssiri stirminati. Nti stu misi li missinisi n'approfittaru, preparànnusi iddi macari a la difisa. Alaimu di Lintini pigghiau la nòmina di Capitanu dû pòpulu e urdinò li difisi pri rènniri la cità cchiù difinnìbili a l'assarti, è urganizzò li citatini pri stari forti e schirati a l'urdinanzi dû cumannu. A lu 25 di giugnettu quanti cchiù navi e milizzî Re Carlu avìa rinisciutu d'aricògghiri, parteru di Catuna e iddu stissu si mbarcò supra a na navi miravigghiusamenti di pùrpura parata, ca parìa movìrisi a la cunquista dû munnu. Pinzava d'aripètiri n'àutra vota "Milazzu", attirannu li citatini arassu dâ cità, sbarcannu a quattru migghia di chista e facennu ruini ntâ campagna: lu pòpulu missinisi buggheva p'arripùnniri a la disfita, ma Alaimu lu trattinù.

A lu 6 di austu, a l'aggiurnata, Carlu apparìggia la sò' màchina di guerra a cìrculu, dû chianu, dû munti, 'n òrdini, cu màchini e urdigni nfiniti; tutti splinenti nti l'armaturi cavàrcanu li schieri dî baruni; Carlu spinci li soi a "no sulu a cummàttiri", ma cci abbannìa "di fari nu granni macellu". Ntò stissu tempu li navi armati, cu n'òria a favuri, su' dintra lu golfu lanzati avanti pri mmèstiri la bucca dû portu. . Ma lu portu, Alaimu, l'avìa rinfurzatu assai dintra, e avìa stinnutu fora tràppuli murtali. Dintra a la catina, ntò portu missinini c'èranu schirati quattòrdici galèi cu n'equipaggiu giuvani e valurusu; ntò menzu àutri sei navi, càrichi di màngani e àutri cunegni; mentri fora dâ catina, c'èranu misi, ammucciati a picca palmi sutta lu pilu di l'acqua, granni riti ca avianu rùmpiri lu movimentu di li navigghi nimichi ca si mpigghiàvanu a iddi; ntâ riva c'era macari nu furtinu e, dintra a chistu, li cummattenti cchiù firoci, cu armi assai boni e tanti àutri urdigni murtali. E ccà principiau la sciarra.

Ivu la granni navi supra lu furtinu e si mpigghiau ntê riti: cu petri e filecci e quantu àutru avianu pê manu li Missinisi la timpistarau, cci jittaru ncoddu spizzuni nfucati, strazzaru li veli. La navi, pirò, tinìa lu stissu la battàgghia, ma quannu spirdiu lu ventu a favuri, cò scafu sfasciatu e li veli strazzati, l'òmini soi ristarau cunfusi e scantati; la granni navi allura s'arritirau e cu idda rincularu tutti l'àutri navi di li franzisi.

Siddu dû mari lu purìculu avìa statu accussì bonu alluntanatu, l'attinzioni vinni allura nnirizzata a l'attaccu pri terra, unni li franzisi avianu scatinatu lu granni assartu; facennu sbàttiri li "gatti" contra li mura pri gràpiri nu purtusù; appujannu scali supra li mura, mentri migghira di filecci dâ fantirìa mmistèvanu li Missinisi supra a li vastiuni. Ma chisti pri nenti scantati, arriscannu la vita ogni vota ca s'affacciàvanu, ittàvanu petri, mazzacani, ogghiu e pici buggenti, e cù focu grecu addumàvanu li scali facennu cascari jusu a li Franzisi.

Arrivati a stu puntu, la risurtanza di la furiosa battaglia non si sapìa cchiui a cui jeva cuntrària e a cui bona; fora e dintra la cità, la fùria di l'assarti e la risistenza a la difisa, avianu sfasciatu tuttu. Sutta a li mura, c'èranu muntagni di scali e màchini d'assèdiu distruggiuti e muntagni di morti di ccà banna e di ddà banna ê mura, o òmini firuti e lamintèvuli ntò cunturcimentu di la morti. Ma li

pèrditi di li Franzisi èranu assai assai, pirchè chisti avianu stati mannati ô macellu, mentri ca chiddi dî missinisi èranu cchiù picca, pâ pusizzioni cchiù megghiu c'avianu nti la battaglia.

Li fimmini di Missina

Lu crunista Giovanni Villani, ntô cuntari li fatti di Missina, accusò scrivìu: «... *Stette lo re con sua oste intorno a Messina da due mesi, e dando la sua gente alcuna battaglia dalla parte ove non era murata, i Messinesi colle loro donne, le migliori della terra, e co' i loro figlioli piccioli e grandi, subitamente in tre dì faccino il detto muro e ripararono francamente gli assalti dei Franceschi ...*»

«*Libbiri muremu sutta a chisti santi mura, ma mai cchiui comu li schiavi piecati a li Franzisi !*»
Accussì cci giuraru li missinisi e cu sti palori nti l'arma affruntaru l'assartu di li guirrerri franzisi; cu quali curaggiu e forza risistìa Missina a l'assèdiu e a la fami, cùntanu tutti li stòrichi dittagghiamenti: li cchiù nòbbili matruni, nzemi a li fimmini populani, vigghiaru a la difisa dû muru, sustinianu lu travagghiu di l'òmini cu cunforti e aiuti, trasportàvanu cu iddi matiriali pi la isata dû mura, c'avìa statu pi na parti sdirubbatu; e nti tri jorna chistu fu isatu, d'avanti a l'occhi di li nimichi, anzi cuntrastati d'iddi ca cci dàvanu ogni mpidimentu; ma appoi, ammirati, popularizzaru lu cuntinenti chî versi sarvati di Malaspini e di Villani: «...*Deh com'egli è gran pietate delle donne di Messina. Veggendole scapigliate portar pietre e calcina. Iddio gli dea briga e travaglio a chi Messina vuol guastare...*»

Santu Truvatu

Movimento per l'Indipendenza della Sicilia

Presidenza Nazionale - Santa Venerina

Via Giovanni Mangano, 17 – Santa Venerina (CT)

Tel. (+39) 095 953464

Mobile (+39) 339 2236028

Uff.cio Segreteria Nazionale Belpasso

Via Lorenzo Bufali, 2 - Belpasso (CT)

Mobile (+39) 368 7817769

Vice Segreteria Nazionale – Porta Voce Uff.le

Via Falsaperla, 6 - Catania

Mobile (+39) 347 3149603

internet: www.mis1943.eu

email: mis1943.presidente@gmail.com

***«Noi vogliamo difendere e diffondere un'idea della cui santità e giustizia siamo profondamente convinti
e che fatalmente ed ineluttabilmente trionferà».***

Andrea Finocchiaro Aprile, 1944



© Movimento per l'Indipendenza della Sicilia - All rights reserved

QUESTO TESTO PUÒ ESSERE LIBERAMENTE E GRATUITAMENTE INOLTROTO, NELLA SUA INTERESSA ED ATTRIBUENDONE L'ORIGINE,
A CHIUNQUE POSSA ESSERE INTERESSATO AI CONTENUTI ESPRESSI E ALLE INIZIATIVE DEL M.I.S.